

# Kes bunuh, dua lagi suspek dibebas dengan jaminan polis

## Tempoh reman ke atas suspek kelima dan ke-11 tamat semalam

Oleh Hafizah Abdul Hamid

**KUCHING:** Seorang gadis berusia 14 tahun dan seorang pemuda berusia 21 tahun yang ditahan reman berhubung kes bunuh seorang remaja lelaki pada 29 Julai lalu dibebaskan selepas tempoh tahanan reman ke atas mereka tamat, semalam.

Majistret Zubaidah Sharkawi semalam menetapkan gadis (suspek ke-11) dan lelaki terbabit (suspek kelima) untuk dibebaskan dengan jaminan polis.

Zubaidah juga mengarahkan kedua-dua suspek untuk melaporkan diri ke balai polis berdekatan sebulan sekali.

Kes disiasat di bawah Seksyen 302 Kanun Keseksaan sebagai kes bunuh.

Terdahulu pada 29 Julai, mangsa yang berusia 18 tahun disahkan meninggal dunia akibat kecederaan parah selepas dipercayai dipukul beramai-ramai di Jalan Tun Jugah.

Kejadian dipercayai berpunca daripada kisah percintaan mangsa.



**REMANTAMAT:** Suspek berusia 14 tahun (depan, kanan) bersama ahli keluarganya di lobi Mahkamah Kuching semalam. Turut kelihatan, suspek kelima (belakang, kiri).

Susulan itu, sejumlah 12 suspek yang merupakan warga tempatan berusia antara 14 dan 50 tahun ditahan reman bagi membantu siasatan kes.

Daripada 12 suspek tersebut, dua lelaki iaitu suspek kesepuluh dan ke-12 dilanjutkan reman sehingga 14

Ogos.

Selain itu, lapan suspek termasuk suspek kelima dan ke-11 telah dibebaskan dengan jaminan polis.

Sementara itu, difahamkan suspek kedua dan keenam dibebaskan tanpa syarat.

Suspek kedua dan keenam

diwakili peguam Voon Lee Shan, manakala suspek ketujuh diwakili peguam Francis Teron.

Suspek kelima dan suspek ke-11 diwakili peguam Daniel Ling, sementara kesemua suspek lain tidak diwakili peguam.